

studiosissimus, eximiam vir clarissimus, immatura morte literis praereptus, ad studia sua in Europa persequenda suppellectilem conquisiverat.

C. Collectio Walkeriana, e voluminibus 222 constans, una cum selecta codicum Persicorum et Arabicorum serie, e dono Guilelmi Walker equitis anno 1845 in Bibliothecam accessit. Quae manuscripta, ab Alexandro Walker, Barodae in Guzzerat provincia sitae praefecto*, seculo superiore exeunte nostroque ineunte collecta, integritate et antiquitate eminent, et in libris classicis Indorum accurate edendis egregium auxilium praestabunt.

D. Septem volumina anno 1837 a B. H. Hodgson, viro de literis Buddhicis optime merito, dono data sunt.

E. Collectio Fraseriana, volumina 41 continens, abhinc quatuor annis e Camera Ratcliffiana in Bibliothecam nostram transposita est.

F. Ultimo loco viginti volumina nominanda sunt, quorum unum inter thesauros a Marsh relictos, quinque in collectione Ousleiana adservantur, reliqua ante paucos annos aut dono aut emptione accesserunt.

In codicibus describendis id nobis maximae curae fuit, ut manuscriptorum conditionem, aetatem, patriam accurate proponeremus. Quem ad finem librorum exordia et epilogos majore ex parte intactos imprimi curavimus. Ubi res et argumentum aliam rationem sequendam postularent, verbis expressis consilium nostrum indicavimus. Emendationibus plerumque tum demum usi sumus, si codices plures aut commentarii praesto essent, ut conjecturis supersedere possemus. Ad aetatem quod attinet, aerae Indicae in Christianam commutatae sunt. Quare ab aera *Samvat* dicta anni 56 deducti, ad alteram *Sáka* appellatam anni 78 additi sunt. Nimis fastidiose in hac re versari noluimus. Aera a scribis non prodita, literatura et aliis indiciis adducti codicum aetatem circumscripsimus. Argumentum et historiam librorum rariorum ex operibus ipsis, qua maxime fieri potuit diligentia investigatis, excerpimus et enarravimus. Qua in re Weberi Catalogus codicum Berolinensium, indices a Westergaard et Boehtlingk editi, necnon manuscriptorum

* Vita 'Brigadier-General Alexander Walker, of the Bombay Army' inscripta, in *Annual Biography and Obituary*, 1832, p. 24 seqq. exstat.